

फिलिप्पी

ब्रेक्ब मुर: पावलमी एको चिठी ब्रेक्शो बाक्ब।

गेना ब्रेक्शो: एको चिठी ६३ ए. डी. नुप्ची ना कि ६४ ए. डी. गोची ना ब्रेक्शो मिम्नीम। एको चिठी ब्रेक्ची ना पावलमी “जेल्खान रे प्रॉइचा पुंडसीनुड” दे आस पाप्तु।

मार ब्रेक्शो: पावलमी जेल्खानम यो ग्येरपाइक्ब लोव्र शेंब। थमा सुइक्बपुकीमी श्येत जाम्तेक्म हना यो, येसु ख्रीस्त कली मप्रॉइचा। थमा सुइक्बपुकीमी दूली शेंब आन पर्बम होस पचा माल्नीम। प्रभु आ पशो मिम्शा, ग्येरसीचा माल्नीम। पावलमी फिलिप्पी आन गुइ रे क्येट ताप्तु। मेको आ पर्बम “रिम्शो पाइब बाक्नीनी” दे ब्रेक्शो बाक्ब।

डोंइती डा लोव्र

1 पावल नु तिमोथी, गो निक्शी ख्रीस्त येसु आ वाइल नस्कु। फिलिप्पी सहरम बाक्शो ख्रीस्त येसु कली थमा सुइक्ब नेल्ल इन कली, थमा सुइक्ब आन कली कोव्रब नु गुम्तीके डा गेय पाइब इन कली चिठी ब्रेक्ताक्ड। प्रेरित १६:३

2 इं आफ परमप्रभु यावे नु प्रभु येसु ख्रीस्तमी इन कली शिशी पा थुं नाइक्चा गेम्सेक्ल।

पावल आ प्रार्थना

3 गो इन कली मिम्शा, आं परमप्रभु यावे कली “गे रिम्शो पाइतीनी” देंनुड। रोमी १:८; १कोरिन्थी १:४

4 गो परमप्रभु यावे नु लोव्र पडानु, गेना हना यो नेल्ल इन कली मिम्शा, ग्येरशा पाइनुड।

5 डोंइती रे मुल सम्म ग्येरपाइक्ब लोव्र पचा कली आं कली वारच पाइतीनी।

6 इन आगामी रिम्शो गेय गोइबमी येसु ख्रीस्त आ जाक्ची ना सम्म थुम्ब, दे तुइक्नुड। फिलिप्पी २:१३; १कोरिन्थी १:८

7 नेल्ल इन पर्बम मोदेशो मिम्चा ठीक बाक्ब। मारदे हना गो इन कली शुश दाक्नुड। आं जेल्खानमी चोक्चा पुंडसीशो, निसाफ पची ना नु ग्येरपाइक्ब लोव्र शेंची ना गो इन कली मिम्नुड। गो नेल्ल खाल का डा शिशी ताइब बाक्नय।

8 ख्रीस्त येसुमी आं कली दाक्पाइक्तीके थुं गेतीके गो इन कली गुम्चा शुश दाक्ताक्ड, परमप्रभु यावेमी मेको तुइक्ब।

9 आं प्रार्थना मार बाक्ब देशा हना, इन दाक्चा शुश बारशा, रिम्शो नु मरिम्शो मार बाक्बा से रुप्ने चाप्नील, दे पुंडशा, परमप्रभु यावे नु लोव्र पचा बाक्ब। फिलेमोन ६

10 मोपा गे नेल्ल क्येडा रिम्शो मार में, दे तुइश्शा, ख्रीस्त आ नाक्ती पाप मपाइब नु दोस मताइब दुम्नीनी। रोमी १२:२; एफिसी ५:१०; १थिस्सलोनिकी ५:२३

11 गेपुकी येसु ख्रीस्तमी पपाइश्शो ठीक पतीकेमी ब्रीशो बाक्तीनी हना, परमप्रभु यावे सक्ति पाइश्शो नु ठेयब बाक्ब, दे तुंडसीब। एफिसी ५:९

पावलमी पशो लोव्र

12 आं लोकबपुकी, आं कली दुम्शो श्येतमी ग्येरपाइक्ब लोव्र ब्रपाइक्तु। १तिमोथी २:९

13 हुकुम पाइब आ खिं डा मुर नु अरु नेल्लेमी गो ख्रीस्त कली थमा सुइश्शो आ पर्बम जेल्खानम बाक्ती, दे तुइक्ताक्म। फिलिप्पी ४:२२

14 मिनु प्रभु कली थमा सुइक्ब लोकब शुशेमी आं कली जेल्खानमी बाक्शो तशा, प्रभु कली थमा सुइक्तीक बारपा महिंथु, परमप्रभु यावे आ लोव्र पाइनीम।

15 का निक्शीमी गेहे पशा, नेल्ल क्येडा ठेयब नड, दे ख्रीस्त आ पर्बम शेंनीम। का निक्शीमी चहिं रिम्शो थुं पा शेंनीम।

16 मोपा शेंबपुकीमी आं कली दाक्शा, गो परमप्रभु यावे आ ग्येरपाइक्ब लोत्र पतीके एकेर बाक्नुड, दे तुइक्नीम।

17 गेहे पा ख्रीस्त आ लोत्र शेंबपुकीम चहिं “गो नेल्ल क्येडा ठेयब नड” दे रिम्शो थुं मपथु, आं कली जेल्खानम श्येत तेम्चा मिम्नीम।

18 मिनु मार? ठेयब लेशशा हना यो, थमा पा हना यो, ख्रीस्त आ पर्बम लोत्र पाम्तेक्म हना, गो शुश ग्येरसीनुड। फिलिप्पी २:१७-१८

19 इन परमप्रभु यावे कली पुंडतीके नु येसु ख्रीस्त आ सोक्तीम आं कली वारच पतीके गो एको श्येत रे ब्रोंडनुड, दे तुइक्नुड। २कोरिन्थी १:११

20 गो काइ मुने मदोक्नुड, दे तुइशशा, आस पाइनुड। मिनु काइ महिंब दुम्शा, ब्रोंडती हना यो, साइक्तीमी हना यो, मुरपुकीमी गेना हना यो ख्रीस्त कली ठेयब सेल्मेक्ल, देंनुड।

21 मारदे हना ब्रोंडडानु, ख्रीस्त कली ब्रोंडनुड, साइक्तीमी हना यो, ग्रानुड। गलाती २:२०

22 गो ब्रोंडती हना, ख्रीस्त आ गेय पाइनुड। तन्न तेको गेय योत्रनुडा मेको मतुइक्नुड।

23 गो निम्फा आस दातेमी बाक्नुड। मेकेर रे लशा, ख्रीस्त नु बाक्चा आं दाक्शो बाक्ब। मारदे हना मेको शुश रिम्शो बाक्ब। २कोरिन्थी ५:८

24 गो ब्रोंडती हना, इन कली शुश रिम्शो दुम्ब।

25 मोदेंब दुम्ब, दे तुइशशा, इन थमा सुइक्चा नु ग्येरपाइक्तीके बारल, दे गो गेपुकी नु बाक्नुड, दे तुइक्नुड। फिलिप्पी २:२४

26 मारदे हना गो इन कली लेंशा गुम्थ जाक्नुड, गेपुकीमी आं जाक्शो आ पर्बम ख्रीस्त येसु कली ठेयब सेल्नीनी।

थमा सुइक्ब श्येत जाइनीम

27 गे इन नाक्त किंत किंत डा पतीकेमी ख्रीस्त आ ग्येरपाइक्ब लोत्र कली शिरशो दुम्शा बाक्कीन। गो गेपुकी नु बाक्ती हना यो,

मबाक्ती हना यो, इन सोक्त का दुम्शा, इन थुं का दुम्शा, ग्येरपाइक्ब लोत्र डा थमा सुइक्तीके गेय पा वारच पमुने।

28 इन कली श्येत गेब आन कली तशा काइ महिनीन। मेकोन मेको आन कली ब्रुतीक चिनु बाक्ब। इन कली चहिं ब्रोंइतीक चिनु दुम्ब। मेको परमप्रभु यावे रे दुम्ब। रथिस्सलोनिकी १:५

29 ख्रीस्त कली थमा सुइक्चा ला इन कली गेशो ममाइ, तन्न मेको आ पबर्म श्येत जचा यो गेशो बाक्ब।

30 मुल आं श्येत जशो खोदेशो पा, गेपुकी यो श्येत जाइनीनी। प्रेरित १६:२२

2

ख्रीस्त खोदेशो दुमीन

1 ख्रीस्त आ पबर्म इन दातेमी थुं बारपाइक्तीके, दाक्शा वारच पाइब, दे थुं नाइक्तीके, थमा सुइश्शा थुं का दुम्तीके, दाक्मुतीके नु शिशी पतीके बाक्तेक्म हना,

2 गेपुकी खाल का डा दुम्शा, उइक्थ उइक्थ पा दाक्मुशा, नेल्ल गारशा थुं का दुम्शा, आं कली शुश ग्येरपाइक्नीनी।

3 गेपुकी ठेयब लेशशा “गो ठेयब नड” दे मिम्शा, काइ गेय मपने। ब्रेम्शो थुंमी “मेको मुर आं क्येडा ठेयब बाक्ब” दे मिम्तीन। गलाती ५:२६; रोमी १२:१०

4 गेपुकी का का पा नेल्लेमी आंम दाक्शो ला ममिम्थु, अरु मुर आन दाक्शो “मार बाक्मे” मेको यो मिम्तीन। १कोरिन्थी १०:२४; १कोरिन्थी १३:५

5 ख्रीस्त येसु नु बाक्शो थुं इन दातेमी कोंइदीन।

6 ख्रीस्त येसु परमप्रभु यावे नु उइक्थ दुम्शो बाक्त हना यो “परमप्रभु यावे नु उइक्थ दुम्ती” दे ममिम्थु, यूहन्ना १:१२; यूहन्ना १७:५

7 मेको नेल्ल प्रोंडशा, वाइल खोदेशो दुम्शा, मुर दुम्शा जरमेसाक्व। यसैया ५३:३; मत्ती २०:२८; २कोरिन्थी ८:९; हिब्रू २:१४,१७

8 मिनु मुर दुम्शा, साइक्चा पुंडसीचा सम्म परमप्रभु यावे कली टिशा, शीम क्याइशशा साइक्चा पुंडसीशा, आ ब्रेम्शो थुं कोंडताक्व। लूका १४:११; हिब्रू १२:२; हिब्रू ५:८

9 मोपतीके परमप्रभु यावेमी मेको कली नेल्ल क्येडा ठेयब सेल्शा, आ नें यो अरु आन क्येडा ठेयब सेल्लु। प्रेरित २:३३; एफिसी १:२१; हिब्रू १:३-४

10 येसु आ नें नेंशा, स्वर्गम बाक्ब, रागीम नु रागी आगाम बाक्ब नेल्लेमी बाप्शा, पोक्च थेक्चा माल्नीम। यसैया ४५:२३; यूहन्ना ५:२३; प्रकाश ५:१२-१३

11 मिनु नेल्लेमी “येसु ख्रीस्त प्रभु बाक्ब” दे परमप्रभु यावे, इन आफ कली ठेयब सेल्चा माल्नीम। प्रकाश ५:१३

परमप्रभु यावे आ आलपुकी

12 आं दाक्शो लोक्बपुकी, गेपुकीमी नेल्ल नाक्त आं देशो टीतीनी। गो बाक्डानु ला ममाइ, गो मबाक्डानु यो मेको क्येडा शुश रिम्शो पने। गेपुकी हिंशा खिंखि पा इन पाप रे ब्रोंडतीक गेय पने। १पत्रुस १:१७

13 मारदे हना परमप्रभु यावेमी इन थुंमी गेय पाइब। मार गेय पाइब देशा हना, आ दाक्शो पचा, दे इन कली दाक्ब थुं गेशा, गेय पपाइक्ब। फिलिप्पी १:६

14 गेपुकीमी सुंडच मपथु, दाल्गीर मपथु, गेय पने।

15 मोपा दोस गेचा मपुंडसीब, परमप्रभु यावे आ रिम्शो आल दुम्नीनी। मरिम्शो नु दूली पाइब मुर आन दातेमी स्वर्ग डा छेडछेड खोदेशो दुम्नीनी। फिलिप्पी १:१०; मत्ती ५:१४; एफिसी ५:८-९

16 मोपा ब्रोंडचा गेब लोव्र मप्रोंडब दुम्नीनी। मिनु ख्रीस्त आ जाक्ची ना गो मो मगाक्ड, मो गेय यो मपड, दे ग्येरशा बाक्चा तडल। २कोरिन्थी १:१४; १थिस्सलोनिकी २:१९

17 गो इन थमा सुइक्चा आ पर्वम गेय पा, साइक्चा पुंइसाक्यी हना यो, ग्येरसीनुड। गे नेल्ल नु ग्येरशा बाक्नुड। २तिमोथी ४:६

18 मोपा गेपुकी यो ग्येरसीने। मिनु गो नेल्ल ग्येरसय। फिलिप्पी ४:४

तिमोथी नु इपाफ्रोडीटस

19 प्रभु येसुमी तिमोथी कली इन कली गुमथ सोइक्चा गेप्टु हना, ब्रा सोइक्नुड। इन पर्वम लोव्र नेंशा, गो यो ग्येरसीनुड।

20 मारदे हना मेको खोदेशो अरु मबाक्नीम। “गेपुकी दोपा बाक्नी माइ” दे थमा पा शुश मिम्शा, सुर्ता पाप्टु। १कोरिन्थी १६:१०

21 नेल्लेमी आंम आंम दाक्शो ला मिम्शा, पना पन बाक्नीमी। येसु ख्रीस्त आ दाक्शा मिम्शो चहिं मपाइनीम। २तिमोथी ४:१०, १६

22 गेपुकीमी तिमोथी कली तुइक्नीनी। दोपा तौमी आ आफ नु गेय पाइबा, मोपा मेको गो नु परमप्रभु यावे आ ग्येरपाइक्ब लोव्र शेंथ गाक्त।

23 मोपतीके आं कली मार मार दुम्बा, मेको तुइक्तु नोले गो मेको कली इन बाक्तीक ब्रा सोइक्नुड, दे आस पाता।

24 प्रभुमी आं कली एकेर रे प्रोंडब, दे थमा सुइक्नुड। मिनु गो यो इक्का नाक्त नोले जाक्नुड। फिलिप्पी १:२५

25 इन सोइश्शो आं कली वारच पाइब आं लोक्ब इपाफ्रोडीटस कली लेशशा सोइक्नुड। मेकोमी गो नु गेय पाप्टु। गो नु काथा गाक्शा, परमप्रभु यावे आ लोव्र शेंताक्व। फिलिप्पी ४:१८

26 मेकोमी नेल्ल इन कली शुश मिम्ताक्व। मारदे हना गेपुकीमी “मेको रोइ पाप्टु” देशो नेंतीनी ने। मोपतीके शुश सुर्ता पाप्टु।

27 इपाफ्रोडीटस थमा पा बेक्चा डा रोइ पाप्तु। तन्न परमप्रभु यावेमी मेको कली शिशी पाइव्तु। मेको कली ला ममाइ, आं कली यो शिशी पाइव्ती। मोपतीके गो शुश श्येत मजड।

28 मेको कली इन बाक्तीके सोइक्चा दाक्नुड। गेपुकी मेको कली लेशशा जाक्शो तशा, ग्येरनीनी। मो दुम्मेनु, आं हेल्शो थुं यो सोपी दुम्ब।

29 गेपुकीमी प्रभु आ नेंमी मेको कली रिम्शो पने, ग्येरसीने। मोदेशो मुर कली ठेयब सेलीन। १कोरिन्थी १६:१६

30 मेकोमी ख्रीस्त आ गेय पशा, आंम कली ममिम्थु, इन पा डा आं कली वारच पथ जाक्मेनु, रोइ पा हेरा बेक्त।

3

पावलम आ पबर्म पशो लोत्र

1 आं दाक्शो लोक्बपुकी आं नोले डा लोत्र मार बाक्ब देंशा हना, प्रभु नु बाक्शा ग्येरसीने। मोदेशो लोत्र गो इन कली ब्रेक्ना ब्रेक्न बाक्ती हना यो, श्येत ममिम्नुड। मेको इन कली बोल्यो दुम्चा कली बाक्ब। फिलिप्पी २:१८; फिलिप्पी ४:४

2 कुचुम खोदेशो मुर आन क्येडा होस पा बाक्कीन। मरिम्शो गेय पाइब आन कली तशा, होस पा बाक्कीन। खोइक्तीक चिनु खोइक्चा माल्ब देंब, आन क्येडा यो होस पा बाक्कीन। प्रकाश २२:१५; गलाती ५:१२

3 मारदे हना गोपुकी थमा खोइक्तीक चिनु डा मुर बाक्नय। गोपुकीमी परमप्रभु यावे आ सोक्त आ पतीकेमी खुम्की पा बाप्शा, परमप्रभु यावे कली गेय पशा, ख्रीस्त येसु आ पतीकेमी ग्येरसय। मुर आ पतीकेमी थमा मसुइय्य। रोमी २:२९

4 गो मुर आन पतीके कली थमा सुइक्ने चाप्नुड। मुरपुकीमी आन पतीकेमी थमा सुइक्ने चाप्नीमी, दे मिम्नीमी। मोदेब दुम्त हना, गो यो मेको आन क्येडा शुश चाप्नुड। २कोरिन्थी ११:१८,२२

5 गो ८ नाक्त डा आल बाक्डानु, खोइक्तीक चिनु ताता। गो इस्राएली नड। गो बेन्यामीन आ थर डा मुर नड। हिब्रू मुर रे जरमेशो, हिब्रू नड। परमप्रभु यावे आ अरेशो पशा, फरिसी दुम्ती। २तिमोथी १:३; प्रेरित २६:५

6 गो थमा सुइक्ब आन कली खेदा पाता। परमप्रभु यावे आ अरेशो लोत्र टिशा, ठीक पाता, दे मिम्शा, दोस मताइब दुम्ती, देती। प्रेरित ८:३

7 तन्न गो ख्रीस्त कली तुइशशा, आंम कली ठेयब सेल्सीतीके नेल्ल ग्येशा प्रोइता। मत्ती १३:४४-४६

8 थमा पा, गो आं डोइती डा पशो जाम्शा लाइब बाक्ब, दे तुइक्ताक्ड। मारदे हना आं प्रभु येसु ख्रीस्त कली तुइक्चा नेल्ल क्येडा ठेयब बाक्ब। मोपतीके मेको आ पबम आं पशो नेल्ल ताइशशा, प्रांग्रा दिचा डा बाक्ब, दे तुइक्ताक्ड। मारदे हना गो ख्रीस्त नु बाक्ब मुर दुम्ती।

9 मोपा आ मुर दुम्शा, परमप्रभु यावे आ अरेशो लोत्र डा आंम ठीक पतीके मबाक्थु, ख्रीस्त कली थमा सुइक्तीकेमी ठीक दुम्तीके बाक्ब। मेको ठीक दुम्तीके परमप्रभु यावेमी गेशो थमा सुइक्तीके रे ला बाक्ब। रोमी ३:२२

10 आं दाक्शो मार बाक्त देंशा हना, गो येसु ख्रीस्त कली तुइक्ने चबुल। आ सेंतीक सक्ति गो नु बाक्ल। दोपा श्येत जशा, साइक्चा पुंइसीशो बाक्मे, मोपा गो यो मोदेशो दुम्डल। रोमी ६:३-५; रोमी ८:१७; गलाती ६:१७

11 दुम्ने चाण्ब हना, गो यो बेक्शो रे सेंसीने चबुल, देती।

पावल आ माल्शो गेय

12 मुल सम्म गो मेको नेल्ल मतड। मिनु ठीक मडुम्ड। तन्न मेको आं के दुम्ल, दे शुश गेय पाइनुड। मारदे हना ख्रीस्त येसुम आं कली आ मुर सेल्लती। कलस्सी १:२९; १तिमोथी ६:१२; प्रेरित ९:३-६

13 आं लोकबपुकी, मुल सम्म गो नेल्ल मतड। तन्न गो मुल मार पाइनुड देंशा हना, आं डोंइती पशो नेल्ल प्रेंशा, मुल पचा माल्शो मार बाक्मे, मेकोन शुश पाइनुड। लूका ९:६२

14 परमप्रभु यावेमी ख्रीस्त येसु आ नेमी आ बाक्तीके रे इनाम गेचा कली मार देंमे, मेकोन शुश पाइनुड। १कोरिन्थी ९:२४

15 इं दातेमी सु सु रुम्ने चाप्ब बाक्नी, मेकोमी आं खोदेंशो पा मिम्तीन। गेपुकीमी आं खोदेंशो पा ममिम्ताक्नी हना, परमप्रभु यावेमी इन कली तुइक्पदल।

16 गोपुकीम मार रुब्ब्या, मेकोन पय।

स्वर्ग डा मुर

17 आं दाक्शो लोकबपुकी, गेपुकी आं खोदेंशो दुमीने। आंइ खोदेंशो पा गेय पाइब आन कली कोव्रशा, मेको आन खोदेंशो पने। १कोरिन्थी ११:१

18 गो इन कली का निक्शी मुर आन पर्वम लोव्र पाता। मुल आं थुं खाइशशा, डाक्शा लोव्र पाइनुड। मारदे हना मेकोपुकी ख्रीस्त आ जोरी सत्रु दुम्शा, आ बेक्शो आ पर्वम मारेइ ममिम्नीम। १कोरिन्थी १:२३; गलाती ६:१२

19 नोले मेकोपुकी जाम्शा लाइनीम। आन कोव्रज कली परमप्रभु यावे क्येडा ठेयब बाक्ब, दे मुने पचा डा गेयमी आंम कली ठेयब सेल्सीशा, आन थुंमी रागी डा माल्शो ला मिम्नीम। रोमी १६:१८

20 तन्न इं बाक्तीक स्वर्गम बाक्ब। मारदे हना गो स्वर्ग डा मुर नय। मेकेर रे इं पाप रे प्रोंइब प्रभु येसु ख्रीस्त जाक्ब, दे रिम्नय। एफिसी २:६; कलस्सी ३:१; हिब्रू १२:२२; तीतस २:१३

21 मेकोमी इं बेक्चशो रां आ सक्ति पाइशशो रां खोदेंशो सेल्ब। मेको आ सक्तिमी नेल्ल आन कली आ डोंइती खुम्की पा बाप्पाइक्ब। १कोरिन्थी १५:४९; २कोरिन्थी ५:१; १यूहन्ना २:३

4

थुं का डा दुमीन

1 मोपतीके आं दाक्शो लोकबपुकी, प्रभु कली थमा सुइश्शा, खोइल थेक्शा बाक्कीन। गो इन कली दाक्शा शुश मिम्नुड। गेपुकीम आं कली ग्येरपाइश्शा, आं ग्रातीक सिरपेच खोदेशो दुम्तीनी। २कोरिन्थी १:१४; १थिस्सलोनिकी २:१९-२०

2 इयोदीया नु सुन्तुके “प्रभु कली थमा सुइश्शा थुं का दुमीस” देंती।

3 मिनु गो नु गेय पाइब वारच, इ कली “मेको मीश मुर निक्शी आस कली वारच पावो” देंती। मारदे हना मेको निक्शीमी गो नु काथ काथा ग्येरपाइक्ब लोत्र शेंतीक गेय पाम्ताक्से। क्लेमेन्त नु अर्को वारच आन कली यो वारच पाम्ताक्से। मेको नेल्ल आन नें ब्रोंडीतीक किताबमी ब्रेक्शो बाक्ब। लूका १०:२०

परमप्रभुमी गेशो थुं नाइक्तीक

4 प्रभु नु बाक्शा गेना हना यो ग्येरसीन। गो लेंशा “ग्येरसीने” देंनुड। फिलिप्पी ३:१; २कोरिन्थी १३:११; १थिस्सलोनिकी ५:१६

5 इन रिम्शो पतीके मुर नेल्ल आन कली कोंइदीने। प्रभु जाक्चशो बाक्ब। तीतस ३:२

6 सुर्ता मपने। परमप्रभु यावे नु लोत्र पा, इन माल्शो पुंइशा “गे रिम्शो पाइब बाक्नीनी” दे परमप्रभु यावे कली देनीन। मत्ती ६:२५-३४; १पत्रुस ५:७

7 परमप्रभु यावे आ गेशो थुं नाइक्तीके रुम्ने मचाप्चा डा ठेयब बाक्ब। मेको थुं नाइक्तीके इन थुं नु इन मिम्शो ख्रीस्त येसु नु बाक्ब। यूहन्ना १४:२७; कलस्सी ३:१५

8 आं लोकबपुकी, आं नेल्ल क्येडा नोले डा लोत्र मार बाक्ब देंशा हना, तेको थमा बाक्बा, तेको शिरशो बाक्बा, तेको ठीक बाक्बा, तेको ग्रांग्रा मदिशो बाक्बा, तेको दाक्चा डा बाक्बा, तेको रिम्शो लोत्र बाक्बा, तेको नेल्ल क्येडा रिम्शो नु दोस

गेचा मपुंडसीब बाक्बा, तेको “रिम्शो पाइब” दे माइक्चा पुंडसीब बाक्बा, मेको आ पर्बम मिम्तीन।

9 गो इन कली मार शेंदु, गे मार रुम्नी, मार नेंनी, आं कली मार पशो तनी, मेकोन पने। मो पाइतीनी हना, इन थुं नाइक्चा गेब परमप्रभु यावे गेपुकी नु बाक्ब।

गेचा नु ताक्चा आ पर्बम

10 गो प्रभु नु बाक्शा शुश ग्येरसीनुड। मारदे हना शुश नाक्त नोले गे आं कली लेंशा मिम्ताक्नी। गेपुकीमी आं कली नेल्ल नाक्त थमा पा मिम्शा बाक्तीनी। तन्न डोंइती मारेइ सोइक्ने मचाप्शो बाक्तीनी। मुल चहिं सोइक्ताक्यीनी।

11 गो श्येत जचा आ पर्बम लोत्र मपाइनुड। मार दुम्त हना यो, ग्येरसीशा बाक्चा, दे शेंसीशो नड। १तिमोथी ६:६

12 प्रुडग दुम्चा नु शोंप पाइश्शो दुम्चा, दोपा बाक्मे, गो मेको निम्फा तुइक्नुड। गो गेना हना यो रूशा बाक्चा नु शोव्रलु बेक्शा बाक्चा, निम्फा शेंसाक्यी। मोपा शुश बाक्त हना यो, काइ मबाक्त हना यो आं कली ठीक दुम्ब। २कोरिन्थी ६:१०

13 आं कली सक्ति गेब आ नेमी गो नेल्ल पने चाप्नुड। २कोरिन्थी १२:१०

14 दोदेंब दुम्त हना यो, गेपुकीम आं कली वारच पशा रिम्शो पाइतीनी।

15 ग्येरपाइक्ब लोत्र शेंचा डोंइती मासीडोनीया रागी प्रोंइशा लडा नोले, सुइमी आं कली वारच मपामे, गे फिलिप्पीपुकीम ला पाइतीनी। गेपुकीम आं शेंशो ताइतीनी, मिनु इन वारच पशो गो ताता। २कोरिन्थी ११:९

16 थिस्सलोनिकी सहरमी बाक्डानु यो, गे निक्शी खेयप वारच पा क्येट सोइक्ताक्यीनी।

17 इन गेशो क्येट ममिम्नुड, तन्न परमप्रभु यावेमी इन मो पशो तशा, इन कली रिम्शो पाइब। गो मोदेंशो तचा दाक्नुड।

18 गो मार मार माल्डा, आं माल्शो क्येडा शुश ताता। इपाफ्रोडीटसमी इन सोइश्शो क्येट गेती। मेको ब्रोव्रशो रिना पाइश्शो परमप्रभु यावे कली च्देशो खोदेशो बाक्ब। परमप्रभु यावे इन मो पशो तशा ग्येरसाक्व। फिलिप्पी २:२५

19 मिनु आं परमप्रभु यावेमी इन माल्शो नेल्ल आ स्वर्ग डा बाक्तीक येसु ख्रीस्त आ पतीक रे शुश गेब।

20 इं आफ परमप्रभु यावे कली गेना हना यो ठेयब सेल्य। आमेन।

नोले डा लोव्र

21 ख्रीस्त येसुमी बाक्शो थमा सुइक्ब नेल्ल आन कली “रिम्शो बाक्कीन” मतीन। गो नु बाक्ब लोकबपुकीमी “रिम्शो बाक्कीन” देंतेक्म।

22 सिजर आ खिं डा नु अरु थमा सुइक्ब नेल्लेमी यो इन कली “रिम्शो बाक्कीन” देंतेक्म। फिलिप्पी १:१३

23 प्रभु येसु ख्रीस्त आ शिशी गेपुकी नु बाक्ल।

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473